

ხელშეკრულება სახელმწიფო შესყიდვის შესახებ N- 76

ქ. გორი

29 მაისი 2017 წელი

ქალაქ გორის მუნიციპალიტეტის მერია (შემდგომში „შემსყიდველი“) მერის ზურაბ ჯირკველიშვილის სახით, ერთის მხრივ და შ.პ.ს „არქიმენსტუდია 2002“ (შემდგომში - მიმწოდებელი) მისი დირექტორის ალექსანდრე მაკრახიძის სახით, მეორეს მხრივ, საქართველოს მოქმედი კანონმდებლობისა და მიმწოდებლის სატენდერო წინადადების საფუძველზე, NAT 170004525 ელექტრონული ტენდერის აუქციონის გარეშე ჩატარების შედეგად დებენ წინამდებარე სახელმწიფო შესყიდვების შესახებ ხელშეკრულებას (შემდგომში ხელშეკრულება) შემდეგზე:

1 გამოყენებული ტერმინების განმარტებები

ხელშეკრულებაში გამოყენებულ ტერმინებს აქვთ შემდეგი მნიშვნელობა:



- 1.1 “ხელშეკრულება სახელმწიფო შესყიდვის შესახებ” (შემდგომ – “ხელშეკრულება”) – შემსყიდველ ორგანიზაციასა და ტენდერში გამარჯვებულ პრეტენდენტს შორის დადებული ხელშეკრულება, რომელიც ხელმოწერილია მხარეთა მიერ, მასზე თანდართული ყველა დოკუმენტით.
- 1.2 “ხელშეკრულების ღირებულება” ნიშნავს საერთო თანხას, რომელზეც გაფორმდება წინამდებარე ხელშეკრულება;
- 1.3 “შემსყიდველი ორგანიზაცია” (შემდგომ “შემსყიდველი”) ნიშნავს ორგანიზაციას (დაწესებულებას), რომელიც ახორციელებს შესყიდვას;
- 1.4 “მიმწოდებელი” ნიშნავს პირს, რომელიც აწვდის შესყიდვის ობიექტს სახელმწიფო შესყიდვის შესახებ მოცემული ხელშეკრულების ფარგლებში;
- 1.5 “დღე”, “კვირა”, “თვე” ნიშნავს კალენდარულ დღეს, კვირას, თვეს.

2 წინამდებარე ხელშეკრულება ადასტურებს შემდეგს

- 2.1 ქვემოთ ჩამოთვლილი დოკუმენტები ქმნიან მოცემულ ხელშეკრულებას და ითვლებიან მის განუყოფელ ნაწილად, კერძოდ:
  - ა) სატენდერო პირობები;
  - ბ) წინამდებარე ხელშეკრულება;
  - გ) პრეტენდენტის მიერ წარმოდგენილი სატენდერო წინადადება და წინადადებაზე თანდართული ყველა სხვა დოკუმენტი;
  - დ) ტექნიკური დავალება;
  - ე) ფასების ცხრილი
- 2.2 ზემოაღნიშნულ დოკუმენტებში დაფიქსირებული ყველა მონაცემი, პარამეტრი, ვადები, ტექნიკური და სხვა პირობები, მხარეთა პასუხისმგებლობის ფორმები და სხვა წარმოადგენენ ხელშეკრულების პირობებს.

3. ხელშეკრულების საგანი

ხელშეკრულების საგანია (შემდგომში შესყიდვის ობიექტი) ქ. გორში, შინდისის გზატკეცილის მარჯვენა მხარეს თარხნიშვილის ქუჩის კვეთიდან გორგასალის ქუჩის კვეთამდე N9, N11, N13 და N15 ბინების მიმდებარედ გაზონებისა და მიმდებარე ტერიტორიის რეაბილიტაციის სამუშაოების (შემდგომში სამუშაოები) - (CPV 45100000) განხორციელება წინამდებარე ხელშეკრულების შესაბამისად.



#### 4 ხელშეკრულების ღირებულება

4.1 ხელშეკრულების ჯამური ღირებულება შეადგენს 28623 (ოცდარვაათას ექვსასოცდასამი) ლარს.

4.2 ხელშეკრულების ღირებულება მოიცავს სამუშაოების სრულყოფილ შესრულებასთან დაკავშირებულ ყველა ხარჯს, მათ შორის კანონმდებლობით გათვალისწინებულ ყველა გადასახადს.

#### 5. ხელშეკრულების შესრულების კონტროლი

5.1 ხელშეკრულებით ნაკისრი ვალდებულებების შესრულების კონტროლს განხორციელებს

ქ. გორის მუნიციპალიტეტის მერის ბრძანებით შექმნილი ინსპექტირების ჯგუფი ან პირი:

5.2 ჯგუფის ან პირის ფუნქციებია:

5.2.1 მისაწოდებელი და/ან მიწოდებული სამუშაოების მოცულობის, ხარისხის, მიწოდების ვადების და გეგმა-გრაფიკის ხელშეკრულების მოთხოვნებთან შესაბამისობის დადგენის მიზნით სათანადო კონტროლისა და ზედამხედველობის განხორციელება და მიღება-ჩაბარების აქტის გაფორმება;

5.2.2 სახელმწიფო შესყიდვების შესახებ ხელშეკრულების პირობების შესაბამისად მიმწოდებელთან ანგარიშსწორების პროცესის რეგულირება.

#### 6. სამუშაოების მიწოდების ვადები და პირობები.

6.1 მიმწოდებელმა სამუშაოები უნდა დაასრულოს და სატენდერო პირობებით და ხელშეკრულების პირობებით მოთხოვნილი დასკვნები წარმოადგინოს ხელშეკრულების გაფორმებიდან 60 (სამოცი) კალენდარულ დღეში.

6.2. სამუშაოების მიწოდების ადგილია ქ. გორი,

6.3. მიმწოდებელმა სამუშაოები უნდა დაიწყოს ხელშეკრულების გაფორმებიდან არაუგვიანეს 5 (ხუთი) კალენდარულ დღეში.

6.4 სამუშაოების შესრულება უნდა განხორციელდეს არსებული სამშენებლო ნორმებისა და სტანდარტების შესაბამისად.

6.5 მუშაოების პროცესში მიმწოდებელი ვალდებულია სამუშაოები შეასრულოს მოქმედი სამშენებლო ნორმების და წესების გათვალისწინებით, სამუშაოების ხარჯთაღრიცხვისა და ტექნიკური ნახაზების შესაბამისად;

6.6 მიმწოდებელმა სამუშაოების დაწყებამდე ტერიტორიაზე უნდა გადაამოწმოს საპროექტო ნიშნულები (მოცულობები) და ნებისმიერი უზუსტობა აცნობოს შემსყიდველს;

6.7 სამუშაოს შესრულების პროცესში უზრუნველყოს ხარისხის და სამუშაოების მიმდინარეობის ზედამხედველობისა და კონტროლის განხორციელებელ პირთა მიერ გაცემული, როგორც ზეპირი ასევე წერილობითი რეკომენდაციების და მითითებების შესრულება;

6.8 სამუშაოების მიმდინარეობის პროცესში ყოველგვარი უსაფრთხოების წესების დაცვაზე სრული პასუხისმგებლობა ეკისრება მიმწოდებელს.



6.9 ტექნიკური დავალებით გათვალისწინებული რომელიმე ვალდებულების დარღვევის შემთხვევაში, აღნიშნულის შედეგად წარმოშობილ ზიანზე სრული პასუხისმგებლობა დაეკისრება მიმწოდებელს

#### 7. შესყიდვის ობიექტის მიღება-ჩაბარების წესი

7.1 შესყიდვის ობიექტი (მისი ეტაპი) ჩაითვლება მიღებულად მხოლოდ მიღება-ჩაბარების აქტის გაფორმების შემდეგ.

7.2 მიღება-ჩაბარების აქტის საფუძველზე, მიმწოდებელი შემსყიდველს წარუდგენს საგადასახადო ანგარიშ-ფაქტურას.

7.3 საბოლოო მიღება-ჩაბარების აქტის გაფორმებამდე მიმწოდებელმა საკუთარი ხარჯებით უნდა წარმოადგინოს შესრულებული სამუშაოს ხარისხისა და მოცულობის დადებითი ექსპერტიზის დასკვნა და გამოყენებული ასფალტობეტონის და ბეტონის (ბეტონის ნაკეთობების)



ლაბორატორიული დასკვნა. შესრულებული სამუშაოს ხარისხისა და მოცულობის შესახებ ექსპერტიზის დასკვნა და გამოყენებული ასფალტობეტონის და ბეტონის (ბეტონის ნაკეთობების) ლაბორატორიული დასკვნა გაცემული უნდა იყოს ლევან სამხარაულის სახელობის სასამართლო ექსპერტიზის ეროვნული ბიუროს ან შესაბამისი აკრედიტაციის მქონე პირის მიერ (აკრედიტირებული პირის მიერ გაცემული დასკვნის წარმოდგენის შემთხვევაში მიმწოდებელმა უნდა წარმოადგინოს შესაბამისი აკრედიტაციის დამადასტურებელი დოკუმენტი).

7.4. გეგმა გრაფიკით განსაზღვრული ყოველი პერიოდის ბოლოს უნდა შედგეს ფაქტიურად შესრულებული სამუშაოების მოცულობების და ღირებულების დამადასტურებელი დოკუმენტი, რომელიც ხელმოწერილი იქნება მიმწოდებლისა და შემსყიდველის ინსპექტირების ჯგუფის წევრების მიერ.

#### 8 ანგარიშსწორება და ვალუტა.

8.1 ანგარიშსწორება მოხდება უნაღდო ანგარიშსწორებით ლარში.

8.2 ანგარიშსწორება მოხდება ფაქტიურად შესრულებული სამუშაოების და დადასტურებული მოცულობების მიხედვით მიღება ჩაბარების აქტის (ფაქტიურად შესრულებული სამუშაოების მოცულობების მიღების აქტი) გაფორმებიდან და შესაბამისი საგადასახადო დოკუმენტაციის წარმოდგენიდან არაუგვიანეს 10 სამუშაო დღეში;

8.3 ანგარიშსწორება შესაძლებელია მოხდეს ეტაპობრივად, სამუშაოების არანაკლებ 20% და არა უმეტეს 70%-ისა, მიღება ჩაბარების აქტის ფორმა №2; №3, ინსპექტირების ჯგუფის მოხსენებისა და შესაბამისი საგადასახადო ანგარიშფაქტურის წარმოდგენის საფუძველზე.

8.4 წინასწარი ანგარიშსწორება არ გამოიყენება

8.5 დაფინანსების წყარო: 2017 წლის ადგილობრივი ბიუჯეტი

#### 9. შესრულებული სამუშაოს ხარისხის გარანტია

9.1 შესრულებული სამუშაოს ხარისხის საგარანტიო ვადად განისაზღვრება საბოლოო მიღება-ჩაბარების აქტის გაფორმებიდან არანაკლებ 3 (სამი) წელი.

9.2 შესრულებული სამუშაოების დასრულების შემდეგ, საგარანტიო ვადის განმავლობაში, რაიმე წუნის (ნაკლოვანებები, დეფექტი) აღმოჩენის შემთხვევაში, თუ დადგინდება რომ აღნიშნული წუნი (ნაკლოვანებები, დეფექტი) გამოწვეულია უხარისხოდ ან/და არაჯეროვნად შესრულებით, მიმწოდებელი ვალდებულია შემსყიდველის მიერ მითითებულ გონივრულ ვადაში აღმოფხვრას უხარისხოდ შესრულებული სამუშაოები საკუთარი ხარჯებით.


#### 10. ხელშეკრულებაში ცვლილებების შეტანა

10.1 არავითარი გადახრა ან ცვლილება ხელშეკრულების პირობებში არ დაიშვება ორივე მხარის მიერ ხელმოწერილი წერილობითი შესწორებების გარდა.

10.2 თუ რაიმე წინასწარ გათვალისწინებული მიზეზების გამო წარმოიშობა ხელშეკრულების პირობების შეცვლის აუცილებლობა, ცვლილებების შეტანის ინიციატორი ვალდებულია წერილობით შეატყობინოს მეორე მხარეს შესაბამისი ინფორმაცია.

10.3 ნებისმიერი ცვლილება, რომელსაც მოჰყვება ხელშეკრულების ფასის გაზრდა ან შემსყიდველისათვის პირობების გაუარესება, დაუშვებელია გარდა საქართველოს სამოქალაქო კოდექსის 398-ე მუხლით გათვალისწინებული შემთხვევებისა.

10.4 საქართველოს სამოქალაქო კოდექსის 398-ე მუხლით გათვალისწინებული პირობების დადგომის შემთხვევაში, დაუშვებელია სახელმწიფო შესყიდვის შესახებ ხელშეკრულების ჯამური ღირებულების 10%-ზე მეტი ოდენობის გაზრდა.



10.5 ხელშეკრულების პირობების ნებისმიერი ცვლილება უნდა გაფორმდეს ხელშეკრულების დანართის სახით, რომელიც ჩაითვლება ხელშეკრულების განუყოფელ ნაწილად.

#### 11 მხარეთა უფლება-მოვალეობები.

11.1 შემსყიდველი და მიმწოდებელი მოქმედებენ საქართველოს კანონმდებლობის სრული დაცვით

11.2 შემსყიდველი ვალდებულია:

11.2.1 დროულად და კეთილსინდისიერად შეასრულოს ხელშეკრულებით ნაკისრი ვალდებულებები;

11.2.2 ხელშეკრულებით გათვალისწინებული სამუშაოების შესრულებისას საქმის კურსში ჩააყენოს მიმწოდებელი ყველა განსაკუთრებული გარემოებების წარმოშობის შესახებ;

11.2.3 ხელშეკრულებით გათვალისწინებული პირობების შესაბამისად აუნაზღაუროს მიმწოდებელს შესრულებული სამუშაოების ღირებულება;

11.2.4 წერილობითი ფორმით დაუყონებლივ აცნობოს მიმწოდებელს რაიმე დეფექტის ან ნაკლის აღმოჩენის შესახებ.

11.3 შემსყიდველს უფლება აქვს:

11.3.1 განახორციელოს კონტროლი და ზედამხედველობა მიმწოდებლის მიერ ხელშეკრულების პირობების დაცვაზე;

11.3.2 განახორციელოს შესრულებული სამუშაოების ტექნიკური ზედამხედველობა და შეამოწმოს მათი შესაბამისობა საქართველოში მოქმედი სამშენებლო ნორმებისა და წესებით გათვალისწინებული ხარისხის კრიტერიუმების, ტექნიკური სპეციფიკაციების, მოქმედი სტანდარტების, სატენდერო პირობების და მიმწოდებლის მიერ წარდგენილი სატენდერო წინადადების გათვალისწინებით;

11.3.3 ხელი მოაწეროს სამუშაოების მიღება-ჩაბარების აქტებს;

11.3.4. მიმწოდებლისაგან მოითხოვოს სამუშაოების წარმოებასთან დაკავშირებული დამატებითი ინფორმაცია და დოკუმენტაცია.

11.4 მიმწოდებელი ვალდებულია:

11.4.1 დროულად და კეთილსინდისიერად შეასრულოს ხელშეკრულებით ნაკისრი ვალდებულებები;

11.4.2 სამშენებლო ნორმებისა და წესების სრული დაცვით უზრუნველყოს სამუშაოების შესრულება.

11.4.3 ფარული სამუშაოები აწარმოოს შემსყიდველის მიერ შესაბამისად უფლებამოსილი პირის უშუალო ზედამხედველობის ქვეშ. მიმწოდებელი ვალდებულია წინასწარ 2 (ორი) სამუშაო დღით ადრე წერილობით და/ან სიტყვიერად აცნობოს აღნიშნული სამუშაოების შესრულების თარიღის შესახებ;

11.4.4 სამუშაოების შესრულების პროცესში შემსყიდველის შეტყობინების მიღებისთანავე აღმოფხვრას უხარისხოდ შესრულებული სამუშაო ან/და შეცვალოს გამოყენებული უხარისხო მასალა შემსყიდველის მხრიდან რაიმე დამატებითი დანახარჯების გაწევის გარეშე;

11.4.5 სამუშაოების შესასრულებლად აუცილებელი მასალები, აღჭურვილობა და მექანიზმების მოწოდება უზრუნველყოფილი უნდა იქნეს მიმწოდებლის მიერ. მიმწოდებელი პასუხისმგებელია აღნიშნული მასალების, აღჭურვილობის და მექანიზმების უსაფრთხოებაზე, ხსენებული მასალების დაკარგვის ან გაუმართაობის შედეგად გამოწვეული რისკი ეკისრება მიმწოდებელს;

11.4.6 მიმწოდებელმა სამუშაოების განხორციელების პროცესში უნდა მიიღოს აუცილებელი ზომები ტექნიკური უსაფრთხოების და გარემოს დაცვის უზრუნველსაყოფად;

11.4.7. ნებისმიერ დროს, წინასწარი შეტყობინების გარეშე დაუშვას შემსყიდველი და მისი წარმომადგენლები სამუშაო მოედანზე.

11.4.8 სამუშაოების დასრულების და მიღება-ჩაბარების აქტის გაფორმების შემდეგ 3 (სამი) წლის განმავლობაში რაიმე წუხის, (ნაკლოვანებები, დეფექტი) აღმოჩენის შემთხვევაში, თუ დადგინდა, რომ აღნიშნული წუხი (ნაკლოვანებები, დეფექტი) გამოწვეულია მისი მიზეზით, მიმწოდებელი

ვალდებულია აღმოფხვრას უხარისხოდ შესრულებული სამუშაოები საკუთარი ხარჯებით შეტყობინების მიღებიდან შემსყიდველის მიერ განსაზღვრულ გონივრულ ვადაში

11.5 მიმწოდებელს უფლება აქვს:

11.5.1 მოსთხოვოს შემსყიდველს შესრულებული სამუშაოების ღირებულების ანაზღაურება ხელშეკრულებით გათვალისწინებული პირობების შესაბამისად.

## 12. ქვეკონტრაქტორები

12.1 ხელშეკრულების გაფორმების შემდგომ მიმწოდებელმა წერილობით უნდა აცნობოს შემსყიდველს წინამდებარე ხელშეკრულების ფარგლებში ყველა შესაძლო ქვეკონტრაქტორის აყვანის შესახებ. მიმწოდებელს არა აქვს უფლება გადასცეს ქვეკონტრაქტორს თავისი უფლებები და მოვალეობები, შემსყიდველის თანხმობის გარეშე.

12.2 სამუშაოების ნაწილის ქვეკონტრაქტორზე გადაცემით მიმწოდებელი არ თავისუფლდება ხელშეკრულებით ნაკისრი ვალდებულებებიდან.

12.3 შემსყიდველის თანხმობის გარეშე ქვეკონტრაქტორის აყვანის შემთხვევაში, შემსყიდველი უფლებამოსილია მიმწოდებელს ცალმხრივად შეუწყვიტოს ხელშეკრულება და დააკისროს ჯარიმა ხელშეკრულების საერთო ღირებულების 2%-ის ოდენობით.

12.4 ქვეკონტრაქტორი კომპანია არ უნდა იყოს რეგისტრირებული სახელმწიფო შესყიდვებში მონაწილე არაკეთილსინდისიერ პირთა რეესტრში- „შავი სია“.

12.5 ქვეკონტრაქტორზე წარმოდგენილი უნდა იქნას შემდეგი სახის ინფორმაცია:

12.5.1 შესასრულებელი სამუშაოების დასახელება და ღირებულება;

12.5.2 ქვეკონტრაქტის ასლი.

12.5.3 ანალოგიური სამუშაოების მიწოდების გამოცდილების დამადასტურებელი დოკუმენტაცია (შესრულებული უნდა ჰქონდეს არანაკლებ ის მოცულობა, რაც გათვალისწინებული იქნება ქვეკონტრაქტით).

## 13. ხელშეკრულების შესრულების შეფერხება

13.1 თუ ხელშეკრულების შესრულების პროცესში მხარეები წააწყდებიან რაიმე ხელშემშლელ გარემოებებს, რომელთა გამო ფერხდება ხელშეკრულების პირობების შესრულება, ამ მხარემ დაუყოვნებლივ უნდა გაუგზავნოს მეორე მხარეს წერილობითი შეტყობინება შეფერხების ფაქტის, მისი შესაძლო ხანგრძლივობის და გამომწვევი მიზეზების შესახებ. შეტყობინების მიმღებმა მხარემ რაც შეიძლება მოკლე დროში უნდა აცნობოს მეორე მხარეს თავისი გადაწყვეტილება, მიღებული აღნიშნულ გარემოებებთან დაკავშირებით.

13.2 იმ შემთხვევაში, თუ ხელშეკრულების პირობების შესრულების შეფერხების გამო მხარეები შეთანხმდებიან ხელშეკრულების პირობების შესრულების ვადის გაგრძელების თაობაზე, ეს გადაწყვეტილება უნდა გაფორმდეს ხელშეკრულებაში ცვლილების შეტანის გზით.

## 14. ხელშეკრულების პირობების შეუსრულებლობა

14.1 ფორს-მაჟორული პირობების გარდა, მიმწოდებლის მიერ ხელშეკრულების პირობების შეუსრულებლობისა ან/და დაგვიანებით შესრულების შემთხვევაში გამოიყენება საჯარიმო სანქციები.

14.2 ხელშეკრულებით ნაკისრი ვალდებულებების შეუსრულებლობისათვის დამრღვევ მხარეს დაეკისრება პირგასამტეხლოს გადახდა ყოველ გადაცილებულ დღეზე შეუსრულებელი ვალდებულების ღირებულების 0.02 %-ის ოდენობით,

14.3 საჯარიმო სანქციების გადახდა არ ათავისუფლებს მიმწოდებელს ძირითადი ვალდებულებების შესრულებისაგან.

14.4 იმ შემთხვევაში თუ ნაკისრი ვალდებულებებისათვის პირგასამტეხლოს ჯამური თანხა გადააჭარბებს შეუსრულებელი ვალდებულების ღირებულების 0.2 % - ს, შემსყიდველს უფლება აქვს ცალმხრივად შეწყვიტოს ხელშეკრულება და მიმწოდებელს დამატებით დააკისროს პირგასამტეხლო ხელშეკრულებით გათვალისწინებული სამუშაოების შეუსრულებელი ვალდებულების ღირებულების 10% - ის ოდენობით.

14.5 იმ შემთხვევაში თუ მიმწოდებელმა სამუშაოები არ დაიწყო ხელშეკრულების გაფორმებიდან 5 (ხუთი) კალენდარულ დღეში, შემსყიდველი უფლებამოსილია ცალმხრივად შეწყვიტოს ხელშეკრულება და დააკისროს მიმწოდებელს ჯარიმა ხელშეკრულების საერთო ღირებულების 10 %-ის ოდენობით.

14.6 შემსყიდველი უფლებამოსილია გეგმა-გრაფიკით გათვალისწინებული შესასრულებელი სამუშაოების 10 დღეზე მეტი ვადით ჩამორჩენის შემთხვევაში (გარდა გეგმა-გრაფიკით გათვალისწინებული საბოლოო ეტაპისა) ცალმხრივად შეწყვიტოს ხელშეკრულება და ხელშეკრულების ცალმხრივად შეწყვეტის შემთხვევაში მიმწოდებელს დააკისროს პირგასამტეხლო ხელშეკრულებით გათვალისწინებული სამუშაოების შეუსრულებელი ვალდებულების ღირებულების 10% - ის ოდენობით.

#### 15. ხელშეკრულების შეწყვეტა მისი პირობების შეუსრულებლობის გამო

15.1 მიმწოდებლის მიერ ხელშეკრულების პირობების შეუსრულებლობის შემთხვევაში შემსყიდველს შეუძლია მიიღოს გადაწყვეტილება ხელშეკრულების სრული ან მისი ცალკეული პირობის მოქმედების ცალმხრივად შეწყვეტის შესახებ.

15.2 ხელშეკრულების ცალკეული პირობების მოქმედების შეწყვეტა არ ათავისუფლებს მხარეებს დანარჩენი ვალდებულებების შესრულებისაგან.

15.3 ხელშეკრულების შეწყვეტა პირობების დარღვევის გამო არ ათავისუფლებს მიმწოდებელს ხელშეკრულების შეუსრულებლობისათვის გათვალისწინებული პასუხისმგებლობისაგან.

15.4 შემსყიდველს შეუძლია მიიღოს გადაწყვეტილება ხელშეკრულების ცალმხრივად შეწყვეტის შესახებ აგრეთვე:

ა) თუ შემსყიდველისათვის ცნობილი გახდა, რომ მისგან დამოუკიდებელი მიზეზების გამო იგი ვერ უზრუნველყოფს ხელშეკრულებით ნაკისრი ვალდებულებების შესრულებას;

ბ) მიმწოდებლის გაკოტრების შემთხვევაში;

გ) საქართველოს კანონმდებლობით გათვალისწინებულ სხვა შემთხვევებში.


15.5 შემსყიდველი უფლებამოსილია მთლიანად ან ნაწილობრივ ცალმხრივად შეწყვიტოს ხელშეკრულება, თუკი დარღვეული იქნება მიმწოდებლის მხრიდან შესყიდვის ობიექტის ხელშეკრულებით ნაკისრი მიწოდების ვადები.

15.6 ხელშეკრულების შეწყვეტა ასევე შესაძლებელია მხარეთა შეთანხმებით.

#### 16. ფორს-მაჟორი

16.1 ხელშეკრულების დამდები რომელიმე მხარის მიერ ხელშეკრულების პირობების შეუსრულებლობა არ გამოიწვევს. საჯარიმო სანქციების გამოყენებას, თუ ხელშეკრულების შესრულების შეფერხება ან მისი ვალდებულებების შეუსრულებლობა არის ფორს-მაჟორული გარემოების შედეგი.

16.2 ამ მუხლის მიზნებისათვის „ფორს-მაჟორი“ ნიშნავს მხარეებისათვის გადაულახავ და მათი კონტროლისაგან დამოუკიდებელ გარემოებებს, რომლებიც არ არიან დაკავშირებული შემსყიდველისა და/ან მიმწოდებლის შეცდომებთან და დაუდევრობასთან და რომლებსაც გააჩნია



წინასწარ გაუთვალისწინებელი ხასიათი. ასეთი გარემოება შეიძლება გამოწვეული იქნას ომით, სტიქიური მოვლენებით, ეპიდემიით, კარანტინით და საქონლის მიწოდებაზე ემბარგოს დაწესებით, საბიუჯეტო ასიგნებების მკვეთრი შემცირებით და სხვა.

16.3 ფორს-მაჟორული გარემოებების დადგომის შემთხვევაში ხელშეკრულების დამდებმა მხარემ, რომლისთვისაც შეუძლებელი ხდება ნაკისრი ვალდებულებების შესრულება, დაუყოვნებლივ უნდა გაუგზავნოს მეორე მხარეს წერილობითი შეტყობინება ასეთი გარემოებების და მათი გამომწვევი მიზეზების შესახებ. თუ შეტყობინების გამგზავნი მხარე არ მიიღებს მეორე მხარისაგან წერილობით პასუხს, იგი თავისი შეხედულებისამებრ, მიზანშეწონილობისა და შესაძლებლობისა და მიხედვით აგრძელებს ხელშეკრულებით ნაკისრი ვალდებულებების შესრულებას და ცდილობს გამონახოს ვალდებულებების შესრულების ისეთი ალტერნატიული ხერხები, რომლებიც დამოუკიდებელი იქნებოდნენ ფორს-მაჟორული გარემოებების ზეგავლენისაგან.

## 17. სადაო საკითხების გადაწყვეტა

17.1 შემსყიდველმა და მიმწოდებელმა ყველა დონე უნდა იხმარონ, რათა ურთიერთ მოლაპარაკებებით და შეთანხმებით მოაგვარონ ყველა უთანხმოება და დავა, წარმოქმნილი მათ შორის ხელშეკრულების ან მასთან დაკავშირებული სხვა კომპონენტის ირგვლივ.

17.2 თუ ასეთი მოლაპარაკების დაწყებიდან არაუგვიანეს 30 (ოცდაათი) დღის განმავლობაში შემსყიდველი და მიმწოდებელი ვერ შეძლებენ სადაო საკითხის შეთანხმებით მოგვარებას, ნებისმიერ მხარეს დავის გადაწყვეტის მიზნით შეუძლია დადგენილი წესის და მიხედვით მიმართოს საქართველოს სასამართლოს, თუ ხელშეკრულების პირობებში სხვა რამ არ არის გათვალისწინებული.

## 18. ხელშეკრულების მოქმედების ვადა

18.1 წინამდებარე ხელშეკრულება ძალაშია მისი ხელმოწერიდან და მოქმედებს 2017 წლის 30 ოქტომბრის ჩათვლით, გარდა ხელშეკრულების მე-9 მუხლისა და მე-11 მუხლის 11.4.8 პუნქტისა.

18.2 წინამდებარე ხელშეკრულების მე-9 მუხლი და მე-11 მუხლის 11.4.8 პუნქტი ძალაშია სამუშაოების საბოლოო მიღება-ჩაბარების აქტის მხარეთა მიერ ხელმოწერიდან 3 (სამი) წლის განმავლობაში.


## 19. სხვა პირობები

19.1 არც ერთ მხარეს არა აქვს უფლება გადასცეს მესამე პირს თავისი უფლებები და მოვალეობები, მეორე მხარის წერილობითი თანხმობის გარეშე.

19.2 მესამე პირთან ურთიერთობაში მხარეები მოქმედებენ თავიანთი სახელით, ხარჯებითა და რისკით.

19.3 ხელშეკრულება შედგენილია ქართულ ენაზე, სამ ეგზემპლარად, რომელთაგან თითოეულს აქვს თანაბარი იურიდიული ძალა და ინახება ხელმომწერ მხარეებთან (ერთი პირი მიმწოდებელთან და ორი პირი შემსყიდველთან). ხელშეკრულებასთან დაკავშირებული ნებისმიერი მიმოწერა შესრულებული უნდა იყოს ქართულ ენაზე.

19.4 გამარჯვებული პრეტენდენტის მიერ წარმოდგენილი ფასების ცხრილი თან ერთვის ხელშეკრულებას და წარმოადგენს მის განუყოფელ ნაწილს.



19.5 წინამდებარე ხელშეკრულების ნებისმიერი ცვლილება ან დამატება ძალაშია მხოლოდ მას შემდეგ, რაც ის წერილობითი ფორმითაა შედგენილი და ხელმოწერილია მხარეთა მიერ.

## 20. რეკვიზიტები

### „შემსყიდველი“

ქ. გორის მუნიციპალიტეტის მერია

ქ. გორი სტალინის გამზ. #16

ს/კოდი 218083767

მიმღების დასახელება: ხაზინის ერთიანი ანგ.

მიმღები ბანკი სახელმწიფო ხაზინა

ბანკის კოდი TRESGE22

მიმღების ანგარიში GE24NB0330100200165022

### „მიმწოდებელი“

შ.პ.ს „არქმშენსტუდია 2002“

ქ. გორი, გურამიშვილის ქ. N14

ს/კოდი 218020914

ბანკი ს/ს „პროგრესიტი ბანკი“


ბანკის კოდი MIBGGE22

ა/ა GE80PC0143600100018853



ქ. გორის მუნიციპალიტეტის მერი

ზურაბ ჯირველიშვილი



შ.პ.ს „არქმშენსტუდია 2002“-ის დირექტორი

ალექსანდრე მაკრაბიძე

II. ქ. გორში შინდისის გზატკეცილზე მარჯვენა მხარეს, თარხნიშვილის ქუჩის კვეთიდან გორგასლის ქუჩის კვეთამდე, 9; 11; 13 და 15 ბინების მიმდებარედ, გაზონებისა და მიმდებარე ტერიტორიის რეაბილიტაციის ხარჯთაღრიცხვა

| №  | სამუშაოს დასახელება                                                                                      | განზ. ერთეული | ერთ. რაოდენობა | ერთეულის ფასი | ჯამი     |
|----|----------------------------------------------------------------------------------------------------------|---------------|----------------|---------------|----------|
| 1  | 2                                                                                                        | 3             | 4              | 5             | 6        |
| 1  | არსებული ბორდიურების დემონტაჟი                                                                           | მ³            | 22,50          | 23,00         | 517,50   |
| 2  | გრუნტის, დაზიანებული ასფალტობეტონის და ბორდიურების დამუშავება და დატვირთვა ავტოთვითმცლელზე ექსკავატორით  | მ³            | 45,0           | 2,50          | 112,50   |
| 3  | გრუნტის დამუშავება ხელით                                                                                 | მ³            | 30,0           | 12,00         | 360,00   |
| 4  | გრუნტის და ბორდიურების ტრანსპორტირება 5 კმ-ზე.                                                           | ტნ            | 90,0           | 3,50          | 315,00   |
| 5  | ახალი ბეტონის ბორდიურების მოწყობა ბეტონის საფუძველზე. ბორდიური ზომით (30X15) სმ. ბეტონის საფუძველი მ-150 | გ.მ           | 450,0          | 16,60         | 7470,00  |
| 6  | ღორღის საფუძვლის მოწყობა სისქ. 10 სმ                                                                     | მ³            | 78,0           | 18,00         | 1404,00  |
| 7  | თხევადი ბიტუმის მოსხმა                                                                                   | ტნ            | 0,5            | 1143,71       | 571,86   |
| 8  | გაზონის მიმდებარედ ტერიტორიის მოწყობა წვრილმარცვლოვანი ასფალტობეტონის ცხელი ნარევით სისქ. 3 სმ           | მ²            | 450,0          | 10,00         | 4500,00  |
| 9  | ეზოში შესასვლელების საფარის მოწყობა წვრილმარცვლოვანი ასფალტობეტონის ცხელი ნარევით. სისქ. 5 სმ            | მ²            | 280,0          | 15,50         | 4340,00  |
| 10 | საკანალიზაციო ჭეხის სიმაღლეთა შესწორება საპროექტო ნიშნულებამდე                                           | ც             | 8,0            | 58,00         | 464,00   |
| 11 | გაზონებში გრუნტის შეტანა მოსწორება .                                                                     | მ³            | 85,0           | 8,70          | 739,50   |
| 12 | გაზონებში კოინდარის დათესვა .                                                                            | მ²            | 570,0          | 0,29          | 165,30   |
|    | ჯამი                                                                                                     |               |                |               | 20959,66 |
|    | ზედნადები ხარჯები %                                                                                      | 6%            |                |               | 1257,58  |
|    | ჯამი                                                                                                     |               |                |               | 22217,23 |
|    | გეგმიური დაგროვება %                                                                                     | 6%            |                |               | 1333,03  |
|    | ჯამი                                                                                                     |               |                |               | 23550,27 |
|    | გაუთვალისწინებელი ხარჯი 3%                                                                               | 3%            |                |               | 706,51   |
|    | ჯამი                                                                                                     |               |                |               | 24256,78 |
|    | დ.დ.გ 18%                                                                                                | 18%           |                |               | 4366,22  |
|    | სულ ჯამი                                                                                                 |               |                |               | 28623,00 |

შპს "არქმშენსტუდია 2002"

დირექტორი

ა. ჯეიშვილი  
ა. ჯეიშვილი  
მ. კარაბიძე

